

T O R E A

HOO I TE MATAHITI HOË: E MAHA TARA — E 2 FARANE I TE VEA HOË.

FRANÇOIS HERVÉ, *Directeur-Gérant*

Te tereraa o te mau Patireia o te Ao nei

Te mau parau api o tei tae mai i te ava'e i mairi aenei, e mau parau maitetai ana'e ia. Ua ore te mau parau opuaraa no te tama'i. E nebenehe ia outou e te mau huitaata no te pae moana patitifi ia tiaturi i teie nei e, ua topa te hau.

* * *

I te fenua Purutia:

Teie nei Patireia o tei mahanahana e o tei tiaturi i nia i te mau oreroraa parau maitetai a to ratou ra taata rahi faatere o Hitler e i ta te mau faaterehau, aita atu ra e hopearaa no to ratou ra tiaturiraa i nia i taua mau parau anaanatae rahi ra. I roto i taua mau parau na'na ra te faahiti ra ia oia e, e riro mai ei Hau Purutia te mau tuhaa fenua atoa o tei puhapahia e te mau huitaata o tei parau ana'e i to'na ra reo, e e riro faahou mai a hoi i te Hau Purutia te mau fenua o tei faaterehia e ana i mua ra e oia atoa te mau fenua ua pu te mau huitaata purutia i reira e tae noa atu i te mau fenua rii aihuaraau ra.

Aita ea teie nei Hau, mai mua mai a e tae roa mai i teie nei, i faatura aenei e aore ra i auraro aenei i te mau vahi i faatitia e ana ra i roto i ta'na mau polititaraa i mua i te mau Hau e'e ra. O ta'na noa ea ia mau peu e rave noa nei e tae roa mai a i teie nei mahana. Na roto i te tamau noa i te hamani i te mau moihaa tama'i, e na roto hoi i te mau arueraa e rave rahi ra, aita atu ra e taia faahouraa o roto i taua mau huitaata ra, ho'e noa iho ta ratou e tiaturi nei i teie nei, maori ra ia o te hopearaa no te vahi ta ratou e titau nei, ua riro hoi ratou i teie nei ei mea taia rahi na te mau Hau rii tapiri atu ia'na ra.

Inaha i teie nei ua rahi roa atu a to Peretane e to Farani piri autaho'eraa. Ua faaite te Hau Polone ia Hitler e, mai te peu

e, e tupu noa'tu â te hoê tama'i ra, e tuu oia i to'na nuu i te paeau no Farani e o Peretane.

Te Hau Rumania o tei tiaturi maite i nia i te Hau Purutia, te otohetohe ra i teie nei, te tarafa tia mai ra i te paeau o Farani ma raua o Peretane.

Noa'tu â te mau parau maitetai e te navenave rahi a Hitler, aita oia e papu maitai ra e, eaha ra te mana'o o Italia i teie nei mahana.

Na roto i te patoi puairaa atu a te Hau Teheto ma te tuutuu ore, i otohetohe ai o Hitler i muri, o tei opua i muri a'e i to'na manularaa i te haru mai i te fenua Oterita, e haru atoa mai i taua fenua ra.

Aita ea te mau tiarepuraa no te tama'i i taaê roa'tu, te imihia nei ra te mau ravea atoa no te faatupuraa i te hau. Ia riro ra te mau moihaa tama'i rahi a te Hau Farani, e faaineine noa a'e ra, mai te reira hoi ta Peretane e ta Marite ei hi'oraa e ei feruri raa na Hitler.

A puhipuhi ana i te Avaava “NATIONALE”

Te avaava oviri o tei hau i te maitai e te hoo-mama, o te hoohia i Papeete nei 1 fr. 10 i te puohu hoê, ia rave oe hoê afata (20 puohu i roto) tei roto te hoê mau taoa rii haamauruuru: tipi ofati e aore ra e tahere arapoa poepoe.

I te fenua Teheto:

E fenua faufaa rahi teie nei fenua na roto i ta'na ra mau ôraa repo faufaa rahi, ta'na mau fare rarahi raveraa ohipa e ta'na mau faaapuraa o tei riro ei nounouraa na Purutia. Te puhapa nei i teie nei, i roto i taua Hau ra e piti mirioni taata purutia mau. Ua riro te tau no te ohipa maitiraa i reira ei tau peapea rahi, no te mea ua hinaaro te mau taata purutia e te mau piri purutia i te faatere noa ia ratou iho, mai ta ratou e hinaaro, mai te haapa'o ore atu i te ture fenua e o tei hinaaro atoa hoi e pee atu i te Hau purutia.

Na roto i te hi'oraa o te Hau purutia i taua mau huru ra, ua farii atu oia i to ratou atoa ra mau hinaaro, e ua horo'a atu ra

i te rima no taua mau piri purutia ra i te moni, te mau moihae tama'i e oia atoa i to'na ra mau mana'o e to'na ra mau hinaaro.

Ua farii maitai-roa-hia hoi taua mana'o no ratou ra e te Hau Purutia, e ua horo'a atu na taua mau piri purutia ra i te moni, te moihaa tama'i, e oia atoa i to'na ra mau hinaaro e to'na ra mau mana'o.

Ua maiti te Hau Teheto 150.000 faehau api, ma te faahua parau e, i maitihia teie nei mau taata, maori ra ia e, no te tapearaa i te hau i roto i te mau taime maitiraa. Ia amuihia teie nei mau faehau api i te mau faehau tahito ra, e nehenehe ia ia ratou ia tapea e ia faahau i te mau huru peapea atoa e tupu ra. A vai taaê noa'tu ai ra te tahi mau mana'o rii i roto i te taata, aita roa hoê a'e peapea i tupu noa a'e. Ua faatae te mau feia mana i te hoê faaueraa ia faahoihia mai te mau nuu fenua i muri e te otia no maûrereraa o te pahi reva i nia i te 10 kilometera te atearaa i te otia fenua.

Ua faaite atoa atu hoi ratou i te mau huiataata purutia e, e farii-hia ta ratou mau aniraa.

Te arato nei te mono o te Hau Farani e te mono o te Hau Pere-tane i te Hau Teheto i nia i te mana'o no te maru e te auraro.

I roto i te oire rahi no te fenua purutia ra, te faaite ra ia te Peretane e, eita oia e hi'o mata noa, mai te peu i faatoro noa'tu o purutia i to'na rima i nia i teie nei Hau Teheto, o Farani ra te faaite papu atura ia e, eita atoa oia e vai iho noa i te reira, no te mea e te vai nei hoê parau faaau o tei faotihia i rotopu ia'na e taua Hau Teheto ra.

Te Pape "GAZOR"

Te "Gazor" e tito ia o tei iritihia mai no roto mai i te mau huru maa tupu atoa o te fenua nei, o tei anoihia i te tihota, te pape e te gaz. Te hoê teie pape o tei hau atu i te maitai no outou e to te Tuamotu na, no te haamaharaa i to outou hiaai maa tahiti, aita hoê topata ava taero i anoihia i roto i teie nei pape **GAZOR**. E hoohia te **GAZOR** e 30 farane i te tatini hoê, e 6 farane i te hoo mohina, ia faahoi-mai outou i te mau mohina, e faahoi faahou-hia'tu te na moni e 6 farane no te tatini mohina pau.

A tamata e homa i te inu i teie nei pape "GAZOR", tena i nia i te mau pahi hootaoa atoa, e aita râ, poroi-roa-mai i Papeete nei, i te piha-ohiparaa a te *Torea*. Ia tamata outou, eita e fiu faahou.

I te fenua Polone:

Teie nei fenua o Polone, ua titi ê ana oia e ua riro mai hoi te tahi mau huiraatira i to'na, inaha 150 aenei matahiti i teie nei i

roto i te Hau purutia te tahi pae, i te Hau Rutia te tahi pae e i te Oterita hoi te tahi pae. Na te tama'i rahi i oli aenei, i faairi faahou ia ratou ei Hau taaê. Ua ite hoi ratou e fenua faufaa rahi to ratou o tei hiaai rahihia e te Hau purutia, e te puhapa atoa nei hoi i nia iho i to ratou ra fenua te tahi pae huitaata purutia o ta Hitler hoi i parau na roto i ta'na mau opuaraa e haru atoa oia i teie nei Hau. E fenua faehau puai e te itoitoe rahi teie nei fenua, e mea rava'i atoa hoi teie nei Hau i te moihaa no te tama'i.

Te pereoo faafaahi e te pereoo uira "PEUGEOT"

Te pereoo taataahi "**Peugeot**", o te mau pereoo ia o tei hau a'e i te maitai i te mau pereoo farani atoa. Ia hoo outou i te pereoo "**Peugeot**", e tia te reira i te vairaa e a tau noa'itu. Ia hoo râ outou i te mau pereoo hoo mama, e moni hoo ia ta outou, eita rōa e maoro ua ino, e au atura ia i te hoê maa tapû rahi auri faufaa-ore.

Te pereoo uira "**Peugeot**", tei te fenua farani ia te hamaniaraa-hia, te hoê teie mau pereoo o tei hau i te maitai e te tano maitai hoi no to outou na mau fenua rii ei fauta horopatete e aore ra ei fauta puha. Ia hoo outou i te pereoo uira (Camionnette) "**Peugeot**", e mauruuru maitai outou i te reira haamauaraa moni, no to'na paari e te iti hoi o to'na mau haamauaraa.

A poroi ana'e mai i to outou mau pereoo taataahi e to outou mau pereoo uira (camionnettes) i Papeete nei ia *M^r René Solari*, mono i te fare "**Peugeot**" e aore ra i te Piha ohiparaa a te "**TOREA**" i Papeete nei.

I te fenua Rumania:

E mau ôraa mori arahu faufaa rahi roa to teie nei fenua e te faufaa rahi hoi o ta'na ra mau faaapu titona. Ua tupu hoi te manuiaraa i taua fenua ra te mau opuaraa a te purutia, e ua tupu hoi i reira te hoê pupu taata o tei parauhia e "gardes de fer" (faehau auri) teie ta ratou mau ohipa e rave, maori ra ia e o te faaino i te faatereraa Hau o taua fenua ra e ma te opua e tiahi ê atu i te arii e a faairi atoa atu ai i taua Hau ra ei Hau tapiri i te purutia. Aita râ i manuihia te raveraa a taua pupu ra, inaha ua roaa oioi noa mai ra i roto i te rima o te arii te mau feia mana faatere, e ua haamouhia i hora ratou, ravehia te mau raatira rarahi faatere tapeahia, haavahia e faautuahia i te utua tapea auri. Aua'e noa iho e, ua ara oioi noa te arii Rumania i te mau peapea rahi ta te purutia e rave ra no to'na patireia.

I te fenua Italia:

Ua manuia maitai roa o Italia i roto i ta'na tama'i e te Etiopia, ua ati ra oia i teie nei i te ati veve e te hinaaro nei hoi oia i te hoê paturu etaeta maitai no te tururaa i te mau rê o tei roaa mai ia'na ra. I te tau no taua tama'i na'na ra, ua hi'o ino o Farani raua o Peretane ia'na, no te mau

peu ta'na i rave ra, ua riro oia mai te hoê mea avaava i mua i teie neiⁱ tau na patireia e no te riri o Italia ua piri tia atu ra oia i te pae purutia. Te hinaaro nei oia e tuu i to'na arii eî Emepera no Etiopia, te hinaaro nei ra oia ia Farani raua o Peretane ia tauturu atu ia'na i te pae no te moni e no te pae taihaa.

Ua riro ra ei mea fifi rahi no te Hau Italia, te riroraa te Hau Oterita i te purutia. No te mea te vai ra i reira te tahi mau tereraa faufaa i ta'na, e o ta'na hoi tiaturiraa ei maitai no'na.

Te araara ra te mata o Mussolini i teie nei, e te ite ra oia i te fifi rahi no to'na patireia, mai te peu e, e tupu noa'û â te hoê tama'i rahi e a riro atu ai te rê i te purutia. A vai taaê noa atu ai to raua autahoê, te haamata rii ra i te au-ore i teie nei.

Te imi nei o Italia i te mau ravea atoa ia piri faahou mai oia i pihai iho ia Peretane raua o Farani.

Te mana'ohia nei e, mai te peu i faatupu noa atu â o purutia i te hoê tama'i, mea papu roa o Italia i te rave i te peu mai tei tupu aenei i te matahiti 1914, a vai iho noa atu ai ia purutia o'na ana'e iho i to'na pae, e a faaitoito noa atu ai oia i te imi i te ora no'na.

I roto i te ratio no te 13 no Tiunu nei, o te haapapuraa mai ia, ia tatou i te ati rahi tei tupu i nia i te mau taata italia i to' ratou puhaparaa i te fenua Etiopia. I nia i te 196.000 taata rave ohipa tei afaihia atu i te fenua Etiopia 158.000 tei faahoi faahouhia i Italia, 1.600 tei pohe roa e te tahi pae ra ua tamata ia i te faaea faahou. To ratou parahiraa i nia i taua fenua Etiopia ra, mea parahi ta pupu ana'e ia ratou i te vahi hoê, te taata e taaê atu i te vahi atea ra, e haruhia ia e taparahi pohe-roa-hia e te Etiopia. E mau vahi ma'i roa te tahi mau vahi o taua fenua ra, te mau Italia o tei puhapa atu na reira, eita e maoro ua pohe, no te mea te vai nei te hoê ma'i fiva ino roa i taua fenua ra, area i te mau taata fenua iho ra eita ia ratou e peapea-hia, no te mea e, ua mara noa ratou i taua fiva ra.

Te faaite-atoa-hia mai ra hoi e, e pau rahi to te afata faufaa a te Italia na roto i teie nei tama'i. Ta'na faufaa toe e vai ra i roto i ta'na afata faaherehere maori ra ia e, e 4 miria moni piru italia. Te faaite atoa mai ra hoi te parau ratio e, e riro te reira ei mea fifi no'na.

O te taime au maitai teie no farani raua o peretane no te iriti mai ia'na mai roto mai ia purutia, na roto i te tautururaa atu ia'na i te tauturu no te paeau moni e no te haamaitai faahouraa hoi ia'na, ma te titau atoa atu ra ia'na i te tahi mau parururaa papu maitai.

I te fenua Rutia:

Te faaea noa a ê ra te fenua Rutia, aita roa a ê e papuraa eaha ra to'na mana'o. Te haere noa ra te faatereraa a Staline i te puairaa. Mai te au

hoi i te mau faataaraa taaê a te ture o taua fenua ra, te haamou-noa-hia ra te mau taata o te faahape i ta'na mau faatereraa, na roto i te faautuaraa ia ratou i te utua pohe, na roto i te pariraa i te tahi mau hapa taaê.

Te imi nei o Staline i te mau ravea atoa eiaha ia tupu faahou te tama'i. E riro ta'na faatereraa ei mea maitai e te puai rahi, mai te peu e, e iriti oia i te mau moihaa tama'i mai roto mai i te rima no to'na mau huiataa. No te mea i roto i te hoê tama'i papaa, ei moihaa tama'i ihoa ta te taata e maitai ai. Eaha ia te ohipa e tupu i reira?

Aita paha ia o Staline, te upoo faātere o te Hau Rutia e feruri ra i te mau faanahonahoraa a Hitler, ua papai o Hitler i roto i ta'na mau faataaraa e, e haru mai oia i te fenua Rutia, e haere hoi oia e puhapa na roto i te mau tuhāa fenua faufaa rahi no Rutia. Te imi ra o Staline i te vahi ā, e maeā ia'na no te faaoreraa, eiaha te tama'i ia tupu faahou i nia i to'na fenua, mea au a'e na'na ia tupu te tama'i i rotou i te purutia e te farani eiaha ra i nia i to'na fenua. E faaea hau noa ia o'na i to'na fenua no na matahiti e rave rahi, ma te peapea ore.

I roto i te fare hooraa raau a **LHERBIER,**

i PAPEETE NEI,

*e roaa ai ia outou te mau huru raau atoa ta outou e hinaaro,
no te mau huru ma'i atoa.*

I reira hoi, e roaa mai ai ia outou te mau raau maitai rahi ra, e:

“RAAMAEROPARAI” raau hīnu parai no te ma'i maero. Raau o tei hau i te maitai no te mau huru ma'i atoa no te iri, mai te ma'i una, te ma'i harorai, e te mau huru ma'i maero atoa.

“RAAMAEROPAPE” raau pape no te ma'i maero. Raau o tei hau atoa i te maitai no te mau huru ma'i atoa no te iri, te ma'i una, te ma'i harorai e te tahi atu ā mau huru ma'i maero. Eita hoi teie nei raau e tafetafeta i nia i te ahu mai te raau RAA-MAEROPARAI ra te huru.

I te fenua Peretane:

Ua vai ineine noa o Peretane no te mahana e tupu noa atu ai te hoê tama'i rahi, mai tei oti ihoa i roto i ta raua parau faaau, o Farani, ia tupu noa'itu te hoê tama'i e tauturu ihoa o'na ia Farani.

Te tere noa ra te mau fare raveraa ohipa i te po e te ao, no te faaineineraa i te mau moihaa puai taaê no te tama'i, noa atu â te reira, te hoo mai nei ia oia i te mau pahi-reva no te fenua Marite.

Ua tuu aenei o Peretane i to'na rima i raro a'e i te hoê parau faaau i faaotihia i rotopu ia'na e o Italia no te faahoa faahouraa ia raua, no te mea hoi, taua hoa no raua ra, ua motu aenei na roto i te tama'i a te Etiopia.

Na roto i taua hoa faahouraa ra, ua iriti ia o Italia i to'na mau faehau i Lybie, fenua aihuaraau no Afirita, tapiri i te fenua Tunisia e i te fenua Aiphiti, mai te faatiâma atoa ra o Peretane i ta'na tama'i no te fenua Etiopia. Ia tii atoa hoi o Italia e iriti i to'na mau faehau e tama'i ra i roto i te tama'i Paniora e tia ai.

"Te Pia AORAI"

Te **Pia Aoral**, oia hoi te Pia apî mau: i ô tatou iho nei hoi te hamani-raahia. — Ua i roa ia i te mau faaitoito e au no te tino.

Te **Pia Aoral**, o te mea ora mau. Ua hau to'na maitai i to te mau Pia atoa e vai nei, e te hoo māmâ hoi.

No to outou na oraraa maitai, a faarahi i te inu i te "**Pia Aoral**", o te hamanihia e te Fare Pia o Tahiti; *Emile MARTIN* te fatu.

I te fenua Tinito:

Te haere noa ra te tama'i i te fenua Tinito, e te tamau noa ra hoi te Tapone i te haere i mua. Teie ra te vahi e maere-rahi-hia nei, o te mea e, te mau oire atoa e roaa mai i te Tapone e haamau ia o'na i te hoê faatereraa Hau i reira, ma te turuhia mai e te mau Tinito iho, i raro a'e ra i ta ratou hiôpoâraa. Te vai nei â te rahiraa no te nuu faehau o Chang Kai Sek e te vai nei â hoi ta'na mau moihaa tama'i. Te haere atoa nei te mau nuu faehau vahine e te mau potii api e aro ma te itoito rahi no te turairaa atu i te enemi. Noa'tu â ra te reira te tamau noa ra ea te Tapone i te haere i mua, e te haamata nei hoi ratou i teie nei i te faau atu i te pae Apatoa no te fenua Tinito, ua huri atu te Tapone i to'na mau nuu faehau na te reira pae e te tupita noa ra hoi to ratou mau pahi reva i te mau oire, e hia rahiraa taata e pohe ra i te mau mahana atoa.

Te parau atoa hia ra hoi e, eita roa o Chang Kai Sek e vi noa a'e, e aro oia e tae noa'tu i te mouraa o te nuu Tapone.

To tatou Tonitara rahi i te fenua Tokio, ua reva aenei ia oia i te fenua Tinito, no te haere e hi'opoa haere i to tatou mau tuhâa fenua e ta tatou mau faufaa e vai ra i reira, e no te faanahonahoraa atu hoi i te paruru no taua mau faufaa ra e te oraraa no to tatou ra mau taata e parahi mai ra i reira.

mau ā to oe, ātaāta noa tura taua taata nei, faateoteo maira ia'na iho i mua i te mimi, ma te feruri ore o'na e, e paari rahi to te mimi, e mau parau faahema ana'e tera ia'na, e ia hope roa taua mau parau faaanaanatae a te mimi ra i nia i taua taata nei, inaha ua parau faahou atu te mimi e:

To oe na mana rahi o tei faariro ia oe, mai te manu taehae rahi ra e Riona, o tei au atoa i to oe na huru, no te mea hoi e, e taata riaria-atoa-hia oe. Te hinaaro nei au i te ite e, eaba, e nehenehe atoa anei ta oe ia faariro ia oe, mai te hoê iore iti fanaua te huru. Te mana'o nei au e, eita paba e nehenehe.

Pahono atu nei te taata tabutahu e, to oe ia mana'o, eita e nehenehe. I taua taime ihora, inaha ua riro atu ra taua taata nei mai te hoê iore iti nainai roa.

I reira ihora hoi te mimi te apuraa atu i nia iho i teie nei iore iti nainai e ua amu ihora.

Inaha oa pohe te taata tabutahu.

E i taua taime atoa ra te tae mai nei te pereoo o te arii i mua i te aorai o te taata tabutahu. Horo atu nei te mimi i mua i te arii.

E ua parau atu ra e, te arii e, te farii-poupou-hia atu nei oe i roto i te aorai o te tamaiti huiarii ra o Carabas.

E no te oaoa hoi o te mau huiraatira no taua oire ra i te mea e, ua pohe te taata tabutahu, aita roa ratou i patoi noa a'e.

Ua maere te arii i te huru no te aorai o teie nei tamaiti, e inaha, ua haapoupou atoa atu ra i te tamaiti huiarii ra o Carabas no to'na farii maitai-raa-hia.

Ua parau atu ra te arii i nia i teie nei tamaiti e, e fenua rahi to oe, e to oe nei hoi aorai parahiraa, ua hau atu ia i te nehe-nehe i toū

Ua farii poupou noa atu ra teie nei tamaiti, i te mau parau maitetai a te arii i nia ia'na no nia iho i to'na ra aorai parahiraa, e o o'na atoa iho hoi i te maereraa i teie nei parahiraa api i to'na, e te maere rahi nei hoi oia i te mau peu i ravehia e ta'na ra mimi, aita râ oia i parau noa a'e hoê parau, te rave nei oia i te mau peu, mai te au, e o'na mau ihoa te fatu no teie nei aora'i rahi.

Ma te parau hoi oia i roto ia'na iho e, aue hoi au i te maere i te ohipa a teie nei mimi e, aita roa vau i mana'o e, e riro mai au i teie nei mahana ei Marquis de Carabas, e e riro hoi au ei fatu no teie nei aora'i rahi faahiahia e e riro hoi au ei tāata faufaa rahi, a riro atu ai hoi au ei hoa rahi no te arii.

(A taiō-mai i te *Veā* i mua nei, no te *tūāhiraa* i teiēnei *aamu*) 22

Te faataaraa i te faaipoiporaa.

Te tūtīraa teie i te mau ture i faaitēhia'tu i te Vea i mairi aenei.

O vai te tia ia ani i te parau no te faataaraa?

O te hoē ia o na taata faaipoipohia o tei mana'o e, te hamani ino-noa-hia ra ona e to'na hoa faaipoipo.

E mea tia na te hoē o raua e aore ra, na raua apipiti atoa e faatae i te parau aniraa no te faataaraa ia raua.

E mea opani-roa-hia i te tahi noa mau taata ēē, i te oomo atoa mai i roto i ta te tahi ē ohipa.

Tei ia vai te mana no te raveraa i teie nei ohipā no te faataaraa.

Tei te Tiribuna Tivira ana'e ia no Papeete nei te mana no te raveraa i taua ohipa ra.

Te mau huru e roaa mai i muri a'e i te faataaraa.

Te faataaraa ra o te haaparariraa ia i te faaipoiporaa i rotopu i te hoē tau na taata faaipoipohia, teie hoi te mau ohipa e tupu i muri mai i taua faataaraa ra, oia hoi:

a] O te faaoreraa ia i te mana faatere o te tane faaipoipo i nia i ta'na vahine faaipoipo, te faataaēraa hoi i to raua faaearaa, te oreraa no te tahi e faatere faahou i nia i te tahi ē, mai te reira atoa hoi te tahi i nia i te tahi.

Te faaruēraa o te vahine i te i'oa o ta'na tane faaipoipo.

A tiamā noa'tu ai hoi i te vahine iho i te faatere i ta'na iho faufaa mai te peu e, ua naeahia to'na paariraa.

A tiamā atoa atu ai hoi raua i te faaipoipo faahou te tahi i te vahine api e te vahine hoi i te tane api, tera rā no te vahine ana'e ra, mea titauhia hoē ahuru ava'e i muri a'e i to'na faataa-raa-hia e tia ai ia'na ia faaipoipo i ta'na tane api.

Area no te mau tamarii faaipoipo o na taata i faataahia nei, aita to ratou mau tiaraa i huru ē, i roto i te taaraa o na metua nei e tiaraa fatu faufaa ihoa to ratou i nia i te faufaa a na metua, e te vai ra ihoa hoi te tiaraa mana metua o na metua i nia-iho i to raua ra mau tamarii.

b] Te hoa faaipoipo tei nia ia'na te faahaparaa a te Tiribuna haavaraa, e tia ia i tei faatiamahia e ani atu i te hoē tuhaa moni no te faaamuraa ia'na, mai te peu e aita mau ihoa ta'na e ravea. Na te Tiribuna ia taua vahi ra e faataa.

2. — I te mahana mau ā, a oti ai te parau haavaraa no te faataaraa, i te reira atoa ihoa ia taime e ore ai te mana no te ture faaipoipo o na taata i faaipoipohia.

Area i mua i te aro o te mau taata atoa ra, i te mahana ia e piahia i roto i te puta tivira.

Te ereraa i te mau maitai no te faaipoiporaa i muri a'e i te faataaraa:

a] Te hoa faaipoipo tei nia ia'na te mau faahaparaa atoa a te Tiribuna haavaraa e te utua moni no te faataaraa, ua ere atoa ia oia i te mau maitai o tei

pupuhia atu e to'na hoa faaipoipo na roto i te hoê parau faaau e aore ra na roto i te tahi noa'tu mau horoâraa taaé (oia hoi mai te mau pupuraa faufaa fenua e te tahi atu â).

b] Te faaitiraa i te mana o te metua tane.

E tuuhia atu te mau tamarii i roto i te rima no te metua o tei faatiamahia i mua i te ture no te faataaraa. E tia atoa ra i te Tiribuna i te haamana noa'tu o vai te taata ta'na i mana'o no te haapa'oraa i te tamarii, i roto anei i te rima no te metua o tei faahapahia i nia i te ture no te faataaraa, e aore ra, i roto anei i te rima no te hoê taata é atu.

Te hoa matamua o tei faataaé i te parau aniraa no te faataaraa, e tia atoa i te tahi ia faatae atoa atu i ta'na atoa aniraa ia au atoa mai te aniraa a to'na hoa. E nehenehe ia'na ia ani, eiaha e no te faataa-roa-raa ia raua, na roto noa ra i te faataaraa tino.

c] Te piti no te faaipoiporaa o na taata i faataahia nei.

Na taata faaipoipo i faataahia nei, ia faaipoipo faahou raua, i to raua hoa api, e nehenehe â ta raua ia faataa-faahou i to raua faaipoiporaa.

Te Taiete Faaapu no Tahiti

Ua ite paatoa tatou i teienei e te rave nei te Taiete Faaapu no Tahiti nei, i te ohipa ta punuraa i te mau maa huru-rau atoa o te fenua nei, oia hoi:

Te iita, te vi, te painapo e te tuvava e te tahi atu â mau maa e au i te tapunu, araua'e iho ia.

Haamana'o tatou, i roto i te taime e hiaamu ai tatou i teie mau maa punu, i te hoo i ta te Taiete Faaapu no Tahiti nei, e te maa-hotu hoi teie o te fenua, e here noa-hia ea ia e tatou paatoa, *e mea au mau hoi*. Eita atura ia e nehenehe ia tatou ia ore ia imi i te haamaharaa o to tatou hiaamu, i taua maa ta-punu nei, e no te fenua iho te hamani-mâ maitairaahia.

TE MAU PARAU API NO TE FENUA NEI

Parau peapea no te Haari:

Ua faaite mai te hoê hoa no te fenua Matuaita no te hoê ma'i api o tei tupu i nia i te haari i roto i te tahi mau motu.

Teie te huru no taua ma'i ra, te hoê ia manumanu uouo mai te utu ra to'na huru, e haamata mai na nia i te raoêre e tae roa mai i roto i te omou o te haari.

Te mau haari atoa tei tauhia e taua utu ra, e pohe roa ia.

Teie atoa hoi te tahi no ta tatou mau anani no Tahiti nei, tae noa'tu i to te mau fenua i Raro Matai, ua tupu-atoa-hia e taua mau ma'i ra e te haamou ra hoi taua ma'i ra i te hoê faufaa rahi no te fenua nei.

Te faaite atoa mai nei hoi te mau taata e haere fei no Tahiti nei e, te mou atoa atu ra te fei i nia i te mouâ i teie nei, te amu atoa-hia ra te tumu e te tahi mau manumanu rii.

No reira te faaite nei te Torea i te mau taata faaapu e, mea maitai a'e ratou i te ani haehaa atu i te Hau ia tauturu mai ia ratou i te imiraa i te ravea no te parururaa i te mau faaapu i roto i to tatou nei fenua iti.

Te vai nei hoi i Tahiti nei, te hoê faatereraa no te pae ohipa faaapu, i raro a'e i te faatereraa a te hoê tamaiti apî roa tei papu maitai te ite i taua tuhaa ohipa ra, e taata itoitohi hoi teie nei taata i nia i taua ohipa ra, teie ra te fifi no te iti te tuhaa moni i faataahia no taua ohipa ra.

E riro ei oaoaraa na te mau feia faaapu, mai te peu te Hau i imi i te mau ravea atoa no te arairaa i ta ratou mau faaapu, na roto i te haamouraa i taua mau manumanu ra, e te haamouraa hoi i te iore.

Rave rahi atoa te mau hoa tei ani mai i te Torea ia faaite atu ia ratou i te huru no te aufauraa no te pirimu no te matahiti 1936. Teie ta matou i pahono atu, tae roa mai i teie nei mahana aita ea hoê parau faataaraa i porohia no te aufauraa i taua pirimu ra.

Mai ta matou â i faaite atu ia outou na roto i te tahi Torea i mairi aenei, rave rahi te mau rata e te mau parau na te reva i faataehia atu ia Mr. Louis de Chappedelaine, no te haavitivitiraa i te aufauraa i taua pirimu ra.

Te faaroohia nei hoi e, ua aufauhia ta to Nouvelles-Hébrides pirimu no te matahiti 1936.

Te faaite papu atoa nei matou e, eere na te faatereraa Hau no Tahiti nei i tapea i te aufauraa i taua pirimu ra, te tia'i nei to tatou Tavana-Rahi i te faaûeraa a te Faatere-Hau, mea maitai a'e no te mau feia e pirimu ta ratou i te faatae atu i te aniraa i to tatou paruru i farani ia roaa mai taua pirimu ra.

A haamana'o maitai atoa tatou e, e Faatere-Hau atoa to tatou paruru no te mau pahi hoo-tao'a e tiaraa teitei hoi to'na i roto i te faatereraa hau i farani.

“Te Metua Auri”

Te hoohia nei i Papeete nei, i te piha ohiparaa a te Torea; te paero 100 kiro: 135 farane i te paero hoê.

Rigault de Genouilly

Ua hoi faahou mai teie nei pahi tama'i i to tatou nei mau pae fenua, no te tahi tau na ava'e. Te mauruuru nei te huiraa-

tira no Tahiti i te ite faahouraa i teie nei pahi iti tama'i farani iêiê mau.

Te manaôhia nei e, e riro paha ia te Tavana Rahi i te haere na teie pahi, no te hiôraa i te tahi tau fenua o tei ore â i haerehia e ana ra, mai te tahi atoa hoi tau Motu no te Tuamotu.

Parau faaite

Hioragi a Hioragi e o Vehi a Hioragi, te faaara nei raua e te *opani etaela roa nei* i te mau taata atoâ i te haere atu e rave i te hoê noa aê faufaa-tupu i nia i te fenua ra o "Okopuahamo" e vai ra i te Motu i Amanu. O raua mau iho te fatu, e no reira, te hinaaro nei hoi raua ia faaturahia taua fenua nei.

Parau no te Torea.

Te mau taata atoa o tei tamatahiti i te Vea Torea nei, e o tei oti aenei ia ratou i te taiô 12 vea, ua ite ia ratou e ua oti ta ratou matahiti, te ani atu nei matou e ia haamana'o taua mau taata nei, i te haponu mai i ta ratou utuâ iti: e maha tara, no teie matahiti e haere nei, e no te ora o ta tatou nei Vea "Torea".

TAIETE ATIMAONO

(Hamaniraa Tihota)

E to te fenua nei, haamana'o tatou i te tauturu maitai i teie nei Taiete, na roto i te hoo-mai i ta ratou tihota.

E mea tiâ roa ia tatou ia na reira, no te mea, te tauturu ra teie nei Taiete i te taata no te fenua nei, mai te rave i te hoê rahiraa taata rave ohipa e te faatupu hoi i te hoê ohipa faahiahia i to tatou ai'a nei.

No reira ia hoo tatou i te tihota, e ani ihoa i te tihota Atimaono; eiaha to te tahi fenua ê atu.

Avaava ovirihia "MARVELS"

Noa'tu e tei hea oe, i Papeete e aore ra i te Mataeinaa, a ani noa'tu i te mau fare-toa i teie nei avaava ovirihia "Marvels"; e te vahi faahiahia roa'tu ia puhipuhi oe e ô mai te mau opuaraa maitatai i roto i to oe upoo e te mama hoi te hoo.

Te Taviriraa matamua no te matahiti 1938, no te fenua nei, no te tautururaa i te faaafaroraa i te afata-moni no te Afata Faaapu.

Ua faatiāhia teienei taviriraa, mai te au i te haamanaraa o te 7 no Tenuare 1937; e o tei faataahia e 6 aê taviriraa i te matahiti.

Ua faataahia e 75.000 farane no te mau titeti tano, mai teie i muri nei te huru, oia hoi: *Hoê rê 20.000 farane. — Hoê rê 10.000 farane. — Hoê rê 5.000 farane. — E 9 rê 1.000 farane.* E te tahi atu ā mau rê huru nainai rii aê.

Te tiāturihia nei e, e na nia i te manuia rahi e te vitiyiti o te riroraa o te mau titeti i hoochia i te mau taviriraa i mua ra, e riro atoā paha ia i te riro oioi i te hoo o to teie taviriraa, mai te mea e mai te reira atoā i teie mearaa, e nehenehe ia, i te haapiripiri i te taime o te mau taviriraa, e te manaōhia nei e e tavirihia teienei taviriraa matamua no teie matahiti i te mau mahana matamua no te avaê Atete. No reira a faaoioi i te hoo i ta outou titeti i teie ihoa tau na mahana.

Te hoochia nei taua mau titeti nei, i te mau vahi atoā e afata na te Hau to reira. Te hoo-atoā-hia ra i te mau Motu o te Tuamotu. Te hoochia ra hoi i nia i te mau pahi hoo-taoā e haerehaere ra na te Tuamotu, o tei faatiā-hia e te Hau no te hoo atu i taua mau titeti nei.

Te ite nei ia outou e, e o te taata atoā e hinaaro ra i te hoo i te hoê titeti, te vai ra, e nehenehe maitai i te hoo-mai, noa'tu e, e teihea oe i te nohoraa, e te mau rê maitatai mau hoi, o te ore-roa e nehenehe i te faaea-noa, eiaha e tamata i to oe na manuia. Ei haamanaō-noa-raa, te rê rahi no te taviriraa matamua mau, e riro mau ia te reira i te hoê taata e noho ra i te Tuamotu, ahiri oia i rave atu, aita ra, ua faahoia-mai i Tahiti nei, mahere e atura. Na reira hoi i te piti o te taviriraa, e titeti faahoia-mai ia no te matacinaa ra o Papeari (Tahiti), e o tei hoochia i te taime hopea i Papeete nei, mahere atoā atura ia.

Manaō noa na oe, e na tera moni iti e piti tara, ia manuia noa'tu, e nehenehe atura ia, ia oe i te faatiā i to oe hinaaro i te hoo i te hoê fare, a ore i te fenua e piri-mai i to oe, a ore hoi i te hoê poti, ore noa'tu te hoê o teie, te tahi atu ā ia mau hinaaro to oe, o tei ore roa ea i manuia aenei e tae roa mai i taua mahana manuia no oe nei, i te titeti i hoochia-mai nei. No reira, a hoo-noa hoê titeti na oe, o tei haere-mai i mua i to mata, eiaha roa e vaiho ia mahere atu, aita hoi i iteahia e o te titeti tano mau, teie e hoochia mai nei ia oe.

Haamanaō-noa na tatou i te tamaiti api nei, o Damas Hunter, e rave i te ohipa i o Donald, e o tei manuia aenei i te rê rahi mau, ua nehenehe maitai ia'na i te hamani i te hoê fare nehenenehe mau, o ta'na e manaō pinepine noa, aita ra hoi e raveā e oti ai, no te rava'i ore i te haaputu na nia i ta'na moni ohipa, inaha, na nia ra i to'na manuia titeti taviriraa, ua roaā ta'na i hinaaro.

Teie nei manuia i topa i nia ia Damas Hunter, e nehenehe atoā ia, i te topa i nia ia oe, eaha oia e ore ai. Ia ore ra hoi oe i te tamata i te rave i te hoê titeti na oe, i tera piti tara iti, auanei paha ia oe e tatarahapa maoro noa ai.

I Farani

Te maere-rahi-hia nei i teienei ia hiôhia e, e te mau orureraa-ohipa e tupu na i mua ra, e mai te haere roa hoi e tapea i te tereraa o te mau Fare Rarahi Ohipa, ua hamata ia i te taime mau a rave mai ai o Léon Blum i te toroâ Faatere-Hau, e ua ore taua mau peapea ra i te taime i faaea ai teie toroâ-mana i nia ia'na.

Te pupu Faatere-Hau a Daladier i teienei, te faatupu faahou ra oia i Farani i te tiâturiraa i nia ia'na e te afaro o te mau ohipa atoâ. Te turu nei te rahiraa o to te fenua, mai te tapiri atu i pihaiho i teie nei faatereraa, mai te paturu mâite-atoâ-hia e te tahi Piha-Faatereraa, oia hoi: te Sena.

I teienei te tere faahou ra te mau fare rarahi raveraa ohipa no te mau moihaa tama'i, mai mua ra. Te Nuu Manu-Reva, o tei haere roa iho nei i te faufaa-ore, ua maitai faahou ia, e te manaôhia nei, e i roto i na matahiti e piti i mua nei, e tiâ faahou ia o Farani i nia roa aê. to'na mau enemi. Te ite ra hoi to'na mau taata faatere manu-reva, e inaha, te horoâhia ra i roto i to ratou rima i teienei ihoa, te mau manu-reva e tiâ ia parau, e mea taoâ mau no niâ i te hamaniraa faahiahia, te paari e te tere. Mea iteahia hoi e mea rava'i o farani i te pae taata faatere manu-reva e te taata ite paari no te pae matini, no te mea no farani te fanauraa mai teie nei ohipa manu-reva, e e tano ihoa ia ia'na ia haru faahou i to'na tiâraa i nia i te upoo o te mau Patireia atoâ i nia i te tereraa o teienei pae ohipa.

O Daladier nei e to'na ra mau taata tauturu, te tuu ra ia ratou i to ratou puai i nia i te tere afaro faahouraa o te ohipa i te mau vahi atoâ o te fenua, e no reira te maraa ra ia te Patireia i nia.

O te mau Patireia hoa o Farani ra, te oaoa ra ia i taua mau tereraa nei.

Te ite nei hoi te mau enemi o farani e te iti atura to ratou manuia, na nia i teienei mau feruriraa api, o tei hau aê ia i te mau huru ravea atoâ no te tapeâraa i te hau. Te vai ra te hoê parau paari i mutaa ihora, na te mau Roma tahito, o tei naô e: « Mai te mea e hinaaro oe i te hau, ia vai ineine noa oe no te tama'i », e o tei vai noa i parau mau ihoa. E ârohia te feia paruparu. E puai ai o Farani, na nia ia i te tahoe e te tiâturi i te Hau. O tatou paatoa, te mau taata farani, no te Hau Metua e te Aihuâraa o tei hinaaro papu i te hau, amui hoê anaê tatou e a tiavaru anaê atu, na te tahi pae, te ohipa enemi i te tahi e i te tahi, te imi hara i rotupu i te taata faatere ohipa e te feia rave ohipa, i rotupu i te huiraatira e te Hau Faatere, i rotupu i te faêhau e te ofitie (taata tapaô), o ta te enemi e hinaaro nei i te aô i ô tatou no te tamataraa ia riro tatou ei titi, ia ohie noa i taua mau taata no te mau fenua êê nei ia haapaô i to ratou hinaaro i nia i to tatou fenua.

Ia riro o Farani ei fenua puai mau, e tano ai te tereraa afaro o teie nei ao, i teie tau. Aita o Farani e faatiatia nei i te hoê noa aê, te hinaaro nei ra, e ora hau noa e te taatoâraa, te hinaaro atoâ nei i te ite e te mau taata atoa e tumarubia ra e to'na reva, ia vai noa i roto i te hau e ia oaoa noa. E no reira te tiâturi nei oia ia faaturahia ta'na mau ture i faatupu, noa'tu e i Farani e aore ra i to'na mau Aihuâraa. E ia iteahia i nia i te mau upoo faatere o te fenua te tura e te afaro no te taatoâraa, ia roaa ia ratou te turu a te taatoa o te huiraatira e te fariiraa i te faatereau, mai te au no te taatoâraa i te ite i te maitai no te fenua.

I te tiâraa mai teienei Faatere-Hau o Daladier, manaô ihora o Farani taa-toa, e e nehenehe ia tiâturi i nia ia'na, e ua ite ihora hoi te taatoâraa o te taata e e rave faahou te tahi e te tahi i ta'na tuhaa ohipa.